

Ch's étrennes.

Quand j'étois jon-ne, y'vaot core eune bielle tradition : ches étrennes.

Comme nous famille alle habitot dins l'même commune et quequ'fos même dins cheule même cité, ch'étoit pont difficile d'aller étrenner Pépère et Mémère, et pis tous ches mon onques et ches ma tantes.

Cha nous f'jot, à pied, eune bielle pourménate, da !

In queumminchot par min mon onque Raoul. In arrivot à s'majon tout indiminchés, pour faire honneur. Mi, j'avos eune bielle marronne courte héritée d'min cousin plus viux qu'mi.. Min mon onque Raoul, y n'chuchot pont delle glache. Cha y'avot donné, à force ed tuter, un nez comme eune penne tierre. In puque, y avot toudis sin vieux béret vissé su tchiète à cause qu'y avot honte ed sin crâne chauve !

M' ma tante alle versot du café pour ches femmes. Ches hommes, y s'infilotent eune coupe ed grands pinards. Des « chômeurs » qu'y s'appelottent cha. Après tout cha, min mon onque y versot un Wambrechies, et quind j'dis un...

Après in allot étrenner m'marraine Nicole. Et cha r'queumminchot : du pinard, du café et du Wambrechies et pour mi, eune bielle pièche et eune limonate.

Quand in avot étrenné tout l'famille, min père y berloquot et m'mère alle l'arténot par sin bras.

Arvenus à nous majon, Papa y ballot dins ch'fauteul et y f'jot simblant d'lire Nord-Matin. Au bout d'eune coupe ed minutes, y prénot d'l'avinche su s'nuit et ronflot comme un sonneur.

Ch't'un bieu souvenir équ' ches étrennes. A ch't'heure, in
souhaite cheule bonne année avec des textos. Pus d'pinard, pus
d'café, pus d'Wambrechies... Mais, ch'est p'tête pas plus mal, da !